

# PROGETU IMPARIS

Su GAL MARMILLA fait isciri a totus ca funt abertas is pre – iscriduras po pigai parti a is rugas formativas – *percorsi formativi*, aintru de su progetu IMPARIS. Su progetu IMPARIS est promovidu de s'Assessorau regionali de sa Laurera e finantziau de s'Assessorau regionali de su Traballu cun dinai de su POR FSE 2007 – 2013 e est fatu de su FormezPA. IMPARIS bolit donai fortza a sa capatzidadi progetuali e de imprenditoria de is operadoris econòmicus de is territòrius *Leader*, cun rugas formativas flessibilis, nobas e chi tenint alliòngius cun sa realidadi. Ant a podi pigai parti a custa formatzioni operadoris econòmicus de su territòriu de s'àrea *Terre Shardana Marmilla*. Su Progetu IMPARIS propònniri 4 rugas formativas:

- Laurera sotziali;
- Ospitalidadi e paesàgiu;
- Multifuntzionalidadi e energias rinnovàbilis;
- Produsidura de cosas de papai e de cosas fatas a manu.

Ònnia ruga formàtiva at a durai tres mesis e s'impènniu at a èssiri de 52 oras in totu, 22 in classi e 30 fatas in e-learning, duncas in Internet. Nc'at a èssiri s'agiudu de su tutor po imperai is ainas informàticas e a s'acabu nc'ant a èssiri viàgius de

formatzioni po biri atras realidadi e si cunfrontai. Is domandas de pre-iscridura ant a depi èssiri fatas aintru de **cenàbura 21 de cabudanni 2012** a sa sea de su GAL MARMILLA in Bobadri, via Baressa n.2, 09090 BARADILI (OR). De su lunis a sa cenàbura s'oràriu est de is noioras a sa una de mengianu, cun cunsinnia a manu o cun racumandada A/R (no ballit su timbru postali)

**Novas Baressesas** at a bessiri prus o mancu una borta a su mesi e s'at podi arriciri inderetura in domu, cun una e-mail: bastat a ddu pediri mandendi una punta de billetu eletrònicu a s'indiritzu [serviziocultura@comune.baressa.or.it](mailto:serviziocultura@comune.baressa.or.it) iscriendi su nòmini, su sangunau e "bollu arriciri *Novas baressesas*". In prus, s'at podi ligi puru in sa bacheca comunali o agatai in medas atividadis comercialis de sa bidda o in sa biblioteca comunali



**Comunu de Baressa**  
Provintzia de Aristanis

Sa redatzioni de **Novas Baressesas** est contivigiada de su Servitziu linguisticu sardu de su Comunu de Baressa e de s'Assessorau comunali a sa Cultura. *S'isportellu linguisticu est a disponimentu de tzitadinus, maistus de iscola, professoris e istudentis po cali si siat informatzioni, fundamentu, duda, crosidadi, bibliografia, sitografia asuba de sa lingua sarda, po consulèntzias didàticas e po contzillus chi pertocant is arrègulas de iscridura de su sardu.*

**Su Servitziu in Cabudanni est abertu:**

<b>Dii</b>	<b>de</b>	<b>a</b>
<b>Ònnia Mèrcuris</b>	<b>10.40</b>	<b>15.10</b>



**Comunu de Baressa**  
Provintzia de Aristanis

## **Novas Baressesas**

☎ 0783-930049 Fax 0783-930118  
e-mail: [info@comune.baressa.or.it](mailto:info@comune.baressa.or.it)

Fòlliu periòdicu de informatzioni istituzionali de su Comunu de Baressa

**Responsabilidadi e proprietadi de su  
Comunu de Baressa (or)**

**Annu II, n. 8**

Acabbau su 5 de Cabudanni de su 2012

## **Edizioni ispetziali**



## FESTA DE SA MÈNDULA

*bintunesima  
annada*

**sàbudu 8 e  
domìnicu 9 de  
cabudanni 2012**

Si fait sciri a totu is baressesus ca **Sàbudu 8 de Cabudanni de su 2012** at a incumantzai sa bintunesima annada de sa Festa de sa Mèndula. A dda apariciai est su Comunu de Baressa custu at a èssiri su programma:

**Sàbudu 8 de Cabudanni**, facioras de is tres de merii (ore 15.00), inghitzu de sa Festa de sa Mèndula in totu su Tzentru istòricu de sa biddu cun *stand* po s'ammostu e po bendi de cosas de papai e bufai, butegas de is artis, ammostu de ceràmicas, cadinus e iscarteddus. S'ant a podi bìsitai a sa Domu museu, sa crèsia manna de Santu Girorgi, su Museu de s'Arti sacra e de "Sa moba"

Facioras de is ses e mesu (18.30) nc'at a èssiri s'isfilada de is màscaras sardas de sa traditzioni: is *Thurpos* de Orotelli, is

*Mamutzones Antigos* de Samugheo, is *Corriolos de Neoneli*.

**Domìnicu 9 de Cabudanni** de is noiras a sa una de mengianu (ore 9.00 -13.00) e de is cuatru a is noiras de merii (16.00 – 21.00) ant a torrai a aberri is *stand* po s'ammostu e po bendi de cosas de papai e bufai, is butegas de is artis, s'ammostu de ceràmicas, cadinus e iscarteddus. S'ant a podi fàiri is bisitas a is monumentus de sa biddu: sa Domu Museu, sa crèsia manna de Santu Girorgi, su Museu de s'Arti sacra e de "Sa moba".

A is cincus e mesu (ore 17.30) in sa ruga de Ellionora, a faci de sa Domu Museu: Rapresentada in libertadi de su traballai sa mèndula in s'antigòriu, e po ddu nai in àterus fueddus, de "s'iscudidura", "s'arregorta" e de "s'iscroxadura".

De is cincus e mesu a is otu de meri (17.30 – 20.00) ant a isfilai e baddai, bistidus a bistiri de sa traditzioni sarda, is grupus de Sant'Isidoru de Baressa, cussu de Pauli, de s'isula de Sant'Antiogu e de San Simmaco de Simaghis.

Facioras de is ses e mesu (18,30) s'ant a podi tastai is drucis de mèndula totus impari.

A is otu e mesu de meri (20,30) ispetàculu etnico - musicali cun sa cantadora Carla Denule in su parcu acanta a sa Domu Comunali \_\_\_\_\_

**Sa bistimenta  
de sa traditzioni Baressesa**



Est cun prexeri mannu ca s'Amministratzioni fait isciri ca est istada torrada a fàiri sa bistimenta traditzionali de Baressa. At a èssiri in ammostu in sa Domu Museu in custas diis de sa bintunesima annada de sa Festa de sa Mèndula. Fatu fàiri cun dinari de su bilànciu comunali, custu bistiri, chi fait parti de su connotu e de s'istòria de biddu nosta, est istau torrau a fàiri pighendi po mollus gunneddas, gipponis, camisas, pabixeddas e sciallus bogaus a pillu de is fàmillias de Baressa chi ndi teniant partis arreguadas po arregordu de aiàius e bisàius.